


景祐乾象新書

八



五星有角占

五星係八卦占

五星經天占

五星摠占

候五星占

五星合聚占

四星合聚占

三星合聚占

二星合聚占

五星比象占

經曰五星有色大小不同各依其行而順時應節

有類青皆比參右肩赤比心大星黃比參右肩白比狼星

龍

二十一

黑比奎大星不失本色而應其四時者吉色害其行凶

五星得位占

經曰五星所出所行所直之辰其國為得位得位者歲星以德熒惑有禮填星有福太白兵彊辰星陰陽和所行所直之辰順其色而有角者勝其色害者敗居實有德也居虛無德也色勝位行勝色行得盡勝之

五星入廟占

經曰營室為清廟歲星廟也心為明堂熒惑廟也南斗

乾象二十

二

為太室填星廟也亢為䟽廟太白廟也七星為負官辰星廟也五星行至其廟謹候其命

五星下降占

經曰五星盈縮失位其精降于地為人歲星降為貴臣熒惑降為童兒歌謠嬉戲填星降為老人婦女太白降為壯夫處於林麓辰星降為婦人吉凶之應隨其象告

五星相合占

經曰五星歲星與填星合為內亂為饑與辰星合為變謀而

更事與熒惑合為饑為旱與太白合為白衣之會合鬪國
有內亂野有破軍為水 太白在南歲星在北名曰牝牡
年穀大熟 太白在北歲星在南年或有或無

熒惑與太白合為燥為喪不可舉事用兵故熒惑從太白
軍憂離之軍舒出太白之陰有分軍出其陽有偏將之
戰與填星合為憂主孽卿 與辰星合為北軍用兵舉事
大敗 一曰熒惑與辰星合為焯不可舉事用兵 填星與
辰星合為壅沮不可舉事用兵有覆軍下師 一曰為

變謀更事必為旱與太白合為疾為白衣會為內兵國亡
地與歲星合國饑 辰星與太白合為變謀為兵憂入太白中
而上出破軍殺將客勝下出客亡地視旗所指以命破軍環
繞太白若與鬪大戰客勝

五星相鬪占

經曰歲星熒惑填星太白與辰星鬪皆為戰兵不在外皆為
內亂凡同舍為合相凌為鬪二星相近其殃大相遠無傷七寸
以內必之

月蝕五星占

經曰月蝕五星其國皆亡歲以饑熒惑以亂填星以殺太白以
彊國戰辰星以女亂 五星入月其野有逐相太白將僂

五星變色占

經曰五星色圜白為喪為旱 赤中不平為兵 青為憂
為水 黑為疾為多死 黃為吉皆角赤犯我城黃地之爭
白哭泣聲青有兵憂黑有水五星同色天下偃兵百姓安寧歌
舞以行不見災疾五穀蕃昌

五星出不出占

經曰五星歲星緩則不行急則過分逆則占 熒惑緩則不
出急則不入違道則占 填星緩則不建急則過舍逆則占
太白緩則不出急則不入逆則占 辰星緩則不出急則不入
非時則占五星不失行則年穀豐昌

五星見伏占

經曰五星見伏留行逆順遲速應歷度者為得其行政合于
常違歷錯度而失路盈縮者為亂行亂行則為天矢彗孛

而有亡國革政兵饑喪亂之禍

五星在陰占

邾萌曰歲星在陰多水熒惑在陰后妃有憂填星在陰
匿謀動太白在陰伏兵起辰星在陰多水潦陰謂五星行
黃道北也

五星所守占

巫咸曰歲星守火熒惑守土填星守金太白守水辰星守木
右五星各守其子則陽氣不足歲多水災民饑 巫咸曰

歲星守土熒惑守金填星守水太白守木辰星守火 右五
星各守所勝則賦斂繁人多徭役強凌弱衆暴寡盜
賊多兵革起 巫咸曰歲星守水熒惑守木填星守火太
白守土辰星守金 右五星守其母有陰謀者必敗或曰陰
氣不足多有火災

五星常色占

歲星色青 熒惑色赤 填星色黃 太白色白 辰星色黑

五星色圓占

青圓為饑 赤圓為旱 黃圓為喜 白圓為喪 黑圓為水病
五星有角占
黃角地之爭 赤角犯我城 白角號泣聲 青角為
憂兵 黑角憂水

五星係八卦占

歲星係於震震者象草木之生動而遲也又似風雷有
時而作耳雷震百里風為號令而震動者

人君之象也故象主德焉 熒惑係於离离火德也凡物之

常動不靜者火也火能照明紅察燔燒積穢蕩除異氣
故熒惑行疾於木而象禮官也察獄以罰萬物易曰相見
乎離大人以係明照于四方故主紅察焉 填星係於坤艮
故行其最遲象地之與山不可移易者女主之德也 太白
係為乾乾為天體行健不息故金行最急易曰說乎兌戰
乎乾故主兵兵須有威故主威兌為說言以說使人以威臨
物乾兌之道也故太白血主兵焉 辰星係于坎坎為水水者晝
夜常流無有休息故水行亦速與金相似坎為水為陰為

盜為刑刑盜於險司獄之官也故其坎所主於刑焉

五星經天占

經曰五星經天者占曰為不臣為更王

晉惠帝永寧元年自正月至于閏月五星互經天縱橫無常星傳曰日陽君道也星陰臣道也日出則星亡臣不得專也晝而星見午上者為經天其占曰為不臣為更王今五星悉經天天變所未有也石申說曰辰星晝見其國不亡則大亂是後台鼎方伯互執大權二帝流亡遂至六夷更王迭據

乾象二十

七

華夏亦載籍所未有也

五星摠占

班固天文志曰五星不失行則年穀豐昌 黃帝占曰有

道之國五星過之不失其行人君吉昌人民安樂無道之

國五星過之則鬪或太白還而不周雖彷徨不去如此者

兵之所攻國家壞亡又主有喪 董仲舒對災異曰五

星失行者大臣非其人賢不肖並立臣亂於下則星錯於

上宜進賢退不肖以救之 平咸曰夫有道之國五星過之

從行無道之國五星過之變色逆行相凌而鬪會合留舍
還守列宿故歲星修仁熒惑修禮填星修信太白修義
辰星修智從之即喜逆之即怒審觀喜以斷其刑明別
五色之變以知吉凶之情 甘氏曰熒惑歲星填星以逆行
為凶以勾已為凶太白以出入不時為凶辰星以不効為凶五
凶並見其年必惡 尚書緯考靈耀曰政失於春歲
星不居其常政失於夏熒惑逆行政失於季夏填星失度
政失其秋太白失行出入不當政失於冬辰星不効其鄉五政
俱失五星色不明年歲不登 樂緯動聲儀曰五音
和則五星如度太白不經天熒惑不反明經天則肅霜至
為旱備反明則水陰至為雨備以樂和之 樂緯什首微
曰聖王律曆不正諸氣不和五音不調則熒惑出入無常太
白逆行見不祥古之謂大凶

候五星占

甘氏曰候歲星以春甲乙 候熒惑以夏丙丁 候填
星以季夏戊己 候太白以秋庚辛 候辰星以冬壬癸凡

候五星各以王日色正則吉若其日色變則為災候之尤切也

五星合聚占

天官書曰五星若合是謂易行有德授慶改立王者掩有四方子孫蕃昌亡德受殃五星皆大其事亦大皆小事亦小周文王七年孟春五星聚房昭理四海文王既没太子發代立是為武王 齊桓公將霸五星聚箕遂能九合諸侯一正天下

漢高祖元年十月五星聚于東井以歷推之從歲星也

李奇曰歲

星得其正度其四星隨此而常正行故曰從也孟康曰歲星先至先至為主也

此高皇帝受命之

符也故客謂張耳曰東井秦地漢王入秦五星從歲星

聚當以義取天下秦王于嬰降於枳道漢王以屬吏寶器婦女亡所取閉宮封門還軍次于霸上以候諸侯與秦民約法三章民亡不歸心者此可謂能行義矣天之所與也五年遂定天下即帝位此明歲星之崇義東井為秦之地明効也

唐天寶九年八月五星聚于尾箕為幽燕之分熒惑為道

而又先去安祿山雖圍逼兩京不日屠滅者此為炎上之應
熒惑先去明矣

四星合聚占

天官書曰四星若合是謂大盪其下兵喪並起君子憂小人
流四星聚者有漢光武晉元帝並中興而魏宋並更紀是四
星聚有以逆易行者

晉安帝義熙三年二月癸亥熒惑填星太白辰星聚于奎
婁從填星也徐州分是時慕容超僭號於齊兵連徐兗
連年抄掠至于淮泗姚興譙縱僭號秦蜀盧循及魏

南北交侵其五年劉裕北殄慕容超是四星合聚之應

後魏普泰元年十月甲寅太白熒惑填星歲星逆入參
觜甚明大占曰當有王者興十月齊高祖起信都至中
興二年春破爾朱兆開霸業

唐肅宗至德二年夏四月壬寅歲星太白熒惑辰星聚于
井鬼井鬼秦地也從木以義肅宗與回紇之衆合天下義
兵於長安城西斬逆賊張通儒十餘萬衆便收東西二京天

下太平是從歲星之德

後唐莊宗同光元年四月己巳即帝位先是唐咸通中太白辰星填星熒惑聚于畢昴占曰趙魏當有王者懿宗命鎮州王景崇被袞冕攝朝臣下備儀仗軍府稱臣三日以厭之至是凡四十九年而應之

後周太祖以漢乾祐四年五月五日即帝位先是丁未年六月填星太白歲星熒惑四星合聚於張占者云有帝王興於周者故漢祖建國由平陽陝服趨洛陽以應之及隱帝將嗣位封周王已符其事而帝以姬號之後復繼宗周而天人之契炳然矣

三星合聚占

天官書曰三星若合是謂驚立絕行其國外有內兵與喪百姓饑乏改立侯王 班固天文志曰三星合民人見饑

邾萌曰歲星熒惑填星與相參會一舍君子過也有亂相為水旱為饑為土功 荊州占曰歲星與熒惑填星同舍相去三尺已外各留七日已上至二十日天下兵起穀貴民饑

郝萌曰歲星熒惑太白鬪殺大將迫之環之貫之殺偏將 又曰太白與歲星填星合其國謀兵起不戰 荊州占曰填星太白辰星合宿為國亡地戰不勝

漢和帝永元五年四月癸巳太白熒惑辰星俱在東井占曰三星合内外有兵又為法令是年七月大水漂殺人民傷五穀九月行車騎將軍事鄧鴻越騎校尉馮柱發左右羽林軍北征叛胡

漢獻帝建安十八年秋歲星填星熒惑俱合入太微逆行留守帝廷百餘日占曰三星入太微宮人主改至延康元年十月禪魏

晉惠帝元康三年填星歲星太白三星聚于畢昴占曰為兵喪昴畢趙地也後賈后陷殺太子趙王倫廢后又殺之斬張華裴頠遂篡位廢帝為太上皇天下從此遘亂連禍

懷帝永嘉六年七月熒惑歲星太白聚牛女之間徘徊進退案占曰牛女揚州分是後兩都傾覆而元帝中

興揚土

後周高祖武帝天和六年八月癸未填星歲星太白合于
氏至次年三月癸卯誅大冢宰晉國公護及其子柱國
譚國公會會弟大將軍莒國公至崇鄴國公靜并
柱國侯伏侯龍恩及其弟大將軍萬壽大將軍劉勇
等大赦改元罷中外府之驗尋以星變下詔曰民勞不
止則星動於天作事不時則石言於國故知為政欲靜
在寧民為治欲安在息役傾興造無度徵發不已加以頻
歲師旅農畝廢業去秋災蝗年穀不登民有散亡
家空杼軸朕每旦恭已夕惕兢懷自今正調以外无妄
徵發庶時躬俗阜稱朕意焉

後周宣帝即位元年六月癸丑歲星熒惑太白合于東
井甲子誅上柱國齊王憲

後周宣帝大象元年四月戊子太白歲星辰星合于東
井至九月以郟國公梁士彥伐陳

唐高祖武德二年三月二十七日太白辰星歲星聚于東

井占曰東井秦分三星合聚改立王公至三年六月戊辰
封皇子元景為趙王元昌為魯王元亨為鄴王皇孫承
崇為太原王承道為安陸王承乾為常山王

唐肅宗乾元元年四月熒惑填星太白合于營室太史
南宮沛奏所合之處戰不勝大人惡之恐有喪禍至明
年三月壬申相州行營郭子儀等與賊史思明戰王師
不利九節度兵潰子儀斷河陽橋以餘衆保東京

唐文宗開成四年正月丁巳熒惑太白辰星聚于南斗占
曰三星合聚有兵喪改立王公至次年正月辛巳上崩於

大明宮

二星合聚占

經曰二星近者為犯二星同宿者為合相犯者其殃大相合
者其殃小 郝萌曰歲星熒惑陽也太白辰星陰也陽主
中邦陰主外邦陽與陰合中外邦相連以兵陽與陽合
兵謀在國內陰與陰合兵謀在邦外 荊州占曰熒惑
當出見而近歲星出其北天下有急兵出其南則有謀臣

在中又曰熒惑歲星相遇當其野旱以饑亡 郝萌曰

歲星熒惑同舍相去三尺以內相守七日已上至四十日其

國有反臣五穀傷百姓不安期一年 荊州占曰熒惑

與歲星接芒於西方諸侯君臣有憂期明年春害農

又曰熒惑與歲星會於東方日爲之蝕不出二年宰相亂

人主之計不定不出三年大兵起 海中占曰熒惑與歲

星合爲內亂臣謀主 天官書曰歲星與熒惑合爲

旱爲饑戰北軍困 荊州占曰歲星與熒惑合相守

國軍大憂近期二年遠三年 郝萌曰填星所在

歲星從之伐者利 荊州占曰歲星所在填星從之伐

者不利又曰歲星與填星同舍相去一二尺而守四十日已

上一百日已下其國更主若久守逆行而復相守以所近之宿

分占之 石申曰地侯與攝提所合之宿有兵大戰不勝亡

地主凶 甘德曰歲星與填星合則爲內亂 文耀鉤

曰填星與歲星合則謀更代事主且失勢天官書曰爲饑

主勿戰必敗 郝萌曰歲星與填星合不過十日則離十

日不離有大禍而及之失律之邦當之 荆州占曰歲星

與填星合其國熟若主人吏死又曰歲星與填星合以合日其

色占之青為疾赤為兵黃為旱白為喪黑為水 又曰歲

星在下填星在上名曰雌雄鬪客軍大敗主軍勝填星

在上六十日不下必有國亡填星為雌歲星為雄 平咸曰

填星與歲星鬪不出其年王者亡地將軍死 荆州占曰

歲星出隨太白於西方王者亡地又曰歲星所在太白從

伐者利有功太白所在歲星從之伐者不利無功又曰

乾象二十七 十六

歲星與太白合而過有兵兵罷太白與歲星相遇命曰伐

其野又曰歲星與太白合光其野有謀兵起其環繞乍東

乍西有逐相 石申曰太白與歲星合于一舍西方凶歲

星出太白左則有年出太白右無年以合之日以知五穀之

有無 陳卓曰甲乙為麥丙丁為黍戊己為粟庚辛為

稻壬癸為豆 荆州占曰太白在歲星南以兵饑在歲星北

以水饑 一曰太白在北方歲星在南方歲困亡國 甘德

曰太白在南歲星在北名曰牝牡其年五穀登 荆州占

曰太白出北歲星出南是謂牝牡相失歲不熟民饑又曰太白
歲星一東一西害王侯一南一北兵乃伏太白歲星未相合太白
從歲星疾主人急歲星從太白疾客急 荊州占曰歲星與
辰星合舍相去三尺而相守七日已上其國君臣俱和道德
相生期百八十日應 天文摠論曰歲星與辰星合為內
兵亂有軍不利先起若光芒相接留守七日至四十日人
流有女喪若相近光芒相入其下大臣謀 黃帝占曰歲
星與辰星合為變謀而更事國有水災人民流亡 文耀鉤

曰主善不失政則熒惑與填星相扶 荊州占曰熒惑入

填星中將軍為亂 石申占曰熒惑與填星會主出走

又曰大人惡之 文耀鉤曰填星與熒惑合則大旱

郝萌曰填星與熒惑合為禍喪其國不可舉事用兵必

受其殃又曰填星與熒惑合舍填星在上熒惑在下名曰子

母相守其下有^者不順填星在下不動其國益強 郝萌

曰熒惑與填星相守憂喪又曰女主憂兵大起 荊州占

曰熒惑所在太白從之伐不利無功太白所在熒惑從之伐

者利有功 文耀鉤曰熒惑從之太白軍憂離之軍舒
出太白之陰有分軍出其陽有偏將戰當其行太白還
之勝又曰出太白之左小戰出太白右去之三尺軍小殺

荊州占曰太白與熒惑遇是謂金入火有兵兵罷國安無
偏使熒惑入太白將軍戮 海中占曰熒惑入太白中

上出破軍殺將客勝熒惑入太白中五十日將死熒惑與
太白相入久而不出其國亂有憂 石申曰熒惑與太

白會爍其下之國不可舉事用兵必受其殃 文耀鉤

曰熒惑與太白合為喪 海中占曰熒惑太白合野有

破軍將死司馬彪曰熒惑與太白合大人憂 荊州

占曰熒惑與太白合主人兵不勝所合之國野有殃二旬

已上兵過其野三旬已上兵宿其野三月不去其國亡太白

在熒惑之上所聚之國且有以義致天下若在左右名曰
祕兵其國必大敗熒惑與太白前後左右成戰客勝太白

出熒惑戴之不出三月兵起太白居熒惑之後而相及也破

軍殺將太白久居熒惑上復居其下有反者 荊州占曰

熒惑所在辰星從之伐者利有功辰星所在熒惑從之伐者不利熒惑與水星相遇不可舉事用兵熒惑辰星合不可用兵命曰自伐一日野有兵不戰兵在外亦罷 石申占曰辰星與熒惑會為泮其國不可舉事用兵必受其殃 班固曰熒惑與辰星合為北軍困 荆州占曰辰星與熒惑合其國大旱赤地千里又為饑將行大敗有覆軍殺將 陳卓曰主出走 荆州占曰熒惑與辰星秋合有兵冬合有喪熒惑辰星合東方辰星白而大兵在外削地而和 荆州占曰填星太白相近數十日間不相去內有姦謀太后有憂 石申曰填星與太白正所合之宿國亡地 甘德曰太白與填星合則為疾為內兵 文耀鉤曰填星與太白合則白衣會 荆州占曰太白與填星合填星色蒼為春多死赤為兵黃為旱又曰填星與太白合太白在填星南名曰牝牡年穀熟在填星北歲備無填星與太白合一舍太白在上填星在下并光不出二月有兵民流行 郝萌曰填星所在辰星從之伐者不利 荆州占曰辰

星所在填星從之伐者利有功又曰辰星出而與填星

會主命不行 石申曰填星與辰星合為壅沮所在之

國不可舉事用兵必受其殃

晉灼曰沮音沮濕之沮也

甘德曰有敗

軍死將

文耀鉤曰內亂饑勿用戰

天官書曰填

星與辰星合為壅沮有覆軍其國不可舉事出亡地入

得地

郝萌曰辰星與填星合有陰謀者

石申曰填

星與辰星合于東方辰星色白而大天下有兵於外列地

相賂為和

天文摠論曰太白辰星同日出於東方東方有

論東二十七

二

兵若同日出於西方西方有兵太白辰星俱出東方皆赤而

角背海之國大敗若與太白俱出西方皆赤而角中國大

敗一云色皆黑外國利又辰星色黑而出與太白不相從其

野雖有軍不戰辰星與太白不相近出于東方辰星若

二十日至三十日不入東方南國有兵不戰至春夏而有兵

辰星與太白不相近出於西方二十日至三十日不入西方北

國有兵 辰星與太白相近三四尺於西方二十日至三十日

有軍戰辰星相去遠不戰 辰星隨太白於西方天下

有兵戰兵解 辰星隨太白於西方天下無兵兵起期六

十日六月太白出辰星北客利辰星出太白北太白出辰星

南主人利若併出東方利以西伐東軍勝若併出西方利

以東伐西軍勝 太白辰星俱出東方太白先出辰星後出

辰星上過太白而去其下有臣背其主不出一年 辰星過太

白間可容劔小戰客勝居太白前上旬三日軍罷若出太

白左小戰歷太白右有數萬人戰主人吏死 辰星來抵太

白不去將死正旗上出破軍殺將客勝 太白出東方辰

卷二十七

二十七

星居其前而不去十五日若二十日而入陰兵滅不大戰客去

兵罷 辰星在西方居太白之前十五日若二十日而入陽兵

滅客去天下有兵 辰星在西方居太白之前辰星入而兵

罷一云天下無兵 辰星在東方居太白之前水官憂兵

有滅 辰星與太白俱在西方居太白之前相近其間可容

劔在西北陰國有兵在西南陽國有兵太白辰星在西南南

國之事在西北北國之事正在西則中國之事 太白辰

星相遇太白避之主人畏客 太白出辰星之左走居太白之

前客小利太白出辰星之右走太白之前主人利辰星入太白中五日而出及入而上出軍破殺將客勝下出客亡地三百里視其所指以命破軍辰星入太白中復出君惡之辰星太白會為兵為變謀 辰星隨太白於西方環繞若抵太白居西北則陰國兵起居西南則陽國兵起期半年太白守辰星其下君凶辰星守太白不去主人殺將死 辰星從太白相守其間可容劍其下有數萬人戰

漢孝殤帝延平元年正月丁酉太白熒惑在婁合為爍為大人憂是歲八月辛亥孝殤帝崩

附錄二十七

二十一

漢孝順帝永和三年二月戊子太白在熒惑西南光芒相犯昌熒惑與太白相犯為兵喪是時大將軍梁商父子秉勢其四年正月祀南郊夕牲中常侍張達蘧政陽定內者令石光尚方令傅福等與中常侍曹騰孟賁爭權白帝言騰賁與商謀反矯詔命收騰賁賁自解說順帝寤解騰賁縛達等自知事不從各奔走或自刺解貂蟬投草中逃亡皆得免

漢順帝漢安二年六月乙丑熒惑光芒犯填星占曰熒惑
犯填星為大人忌明年順帝崩次年正月孝冲帝又崩
魏明帝太和四年十月壬戌太白犯歲星占曰有大兵五年
三月諸葛亮以大衆寇天水時宣帝為大將軍拒退之
魏明帝青龍二年二月己未太白犯熒惑占曰大兵起有大
戰是年四月諸葛亮據渭南吳亦起兵應之魏東西奔命
晉惠帝太安三年正月熒惑犯歲星占曰有戰七月左衛將
軍陳眎奉帝伐成都六軍敗績

晉惠帝光熙元年九月填星犯歲星占曰填星與歲星
合為內亂是時司馬越專權終以無禮破滅內亂之應十
二月癸未太白犯填星占曰為內兵有大戰是後河間王為
東海王越所殺明年正月東海王越殺諸葛玫等五月
級柔破馮嵩殺東燕王八月苟晞大破汲柔

晉懷帝建武元年五月癸未太白熒惑合於東井占曰金
火合曰燔為喪是時愍帝蒙塵于平陽七月崩于寇庭
晉成帝咸康三年十月乙丑太白犯歲星于營室占曰為

兵饑四年二月石季龍破幽州遷萬餘家以南五年季龍
衆五萬寇河南略七千餘家而去又騎二萬圍陷邾城殺
掠五千餘人

晉康帝建元元年八月丁未太白犯歲星在軫占曰有
大兵是年石季龍將劉寧寇沒狄道

晉海西公太和元年八月戊午太白犯歲星在太微中三
年六月甲寅太白奄熒惑在太微端門中六年海西廢

晉簡文帝咸安二年正月己酉歲星犯填星在須女占曰

紀象二十七

二十四

為內亂七月帝崩桓溫擅權謀殺侍中王坦之等內
亂之應

晉孝武帝太元十九年十二月癸丑太白犯歲星在斗占
曰為亂饑為內兵斗吳越分至隆安元年王恭等舉兵
顯王國寶之罪朝廷殺之是後連歲水旱饑

後周高祖武帝保定二年十一月壬午熒惑犯歲星於
危南占曰貴人憂三年正月乙酉太保梁國公侯莫陳
崇賜死

後周高祖武帝天和二年六月丁酉太白歲星合于柳九月衛公直等與陳將淳于量吳明徹戰于池口王師失利冬齊將斛律明月寇邊於汾北築城自華谷至於龍門後周高祖武帝天和五年十月丙戌太白填星合于氐丁酉太傅鄭國公達奚武薨

後周宣政元年七月丙辰熒惑太白合于七星九月汾州稽胡帥劉受羅千舉兵反詔上柱國越王盛為行軍元帥率衆討平

紀事二十七

二十五

後周靜帝即位元年九月甲申熒惑歲星合于翼壬辰廢皇后司馬氏為庶人

唐肅宗至德元年十月二十六日熒惑太白同犯昴占曰為旄頭主胡兵太白為上將熒惑犯之主胡有兵至次年正月丙寅武郡九姓商胡安門物等叛殺節度使周泌判官崔旃率衆討平

唐睿宗景雲二年七月太白填星合于張石氏占曰金土

合主内外有兵至三年六月庚申幽州都督孫佺率左
統衛將軍李楷等將兵三萬與奚首領李大輔戰于砢
山為賊所敗佺歿于陣

唐憲宗元和十五年庚子歲三月填星太白合於奎占曰
内亂十一月熒惑填星合于奎十二月又合婁為反臣二月
填星辰星合婁占曰奎婁為徐州内亂變謀至長慶二
年壬寅歲三月徐州節度使崔羣為將王智興所謀
遂出歸京走

紀事二十七

二十六

唐穆宗長慶二年二月甲戌夜熒惑犯歲星相近占曰
有戰三月朱克融王廷湊合兵攻深州不解元翼率十
餘騎突圍出深州來朝深州大將臧平等一百八十人
皆為廷湊所殺

唐武宗會昌四年三月戊午太白犯填星占曰兵出至九
月党項叛車駕親征

景祐乾象新書五星摠占卷第二十七

景祐乾象新書彗星孛星占卷第二十八

彗星占

孛星占

彗星占

傳曰彗星所以除穢而布新也 晉書曰彗星世所謂
掃星本類星末類彗小者數寸長或彗天見則兵起大
水主掃除除舊布新有五色各依五行本精所主史
臣按彗體無光假日而為光故夕見則東指晨見則西指
在日南北皆隨日光而指頓挫其芒或長或短光芒所及

卷第二十八

一

為災 天文摠論曰彗星色赤為大臣謀叛若兩軍相對
有彗星見隨彗所指擊之勝彗星者有行有止若行者
事小止者事大各以分野占其善惡彗象大掃修短無
常鉤命決曰彗五彗也蒼彗則王侯破天子若兵赤彗則
賊起強國恣黃彗則女害色摧奪於后妃白彗則將軍
逆二年兵大作黑彗則江河決賊處處起 韓楊占曰彗
星其象若竹彗林木條長短無常其長大見久災深短小
見不久災狹 春秋孔圖曰海精死彗星出 考異郵曰

鯨魚死彗星出 京房對災異曰彗星出為饑為兵臣下失忠務私故出彗埽除之 京房易祿占曰君為禍則彗星出 河圖帝紀曰彗星者天地之旗也 劉向洪範

傳曰彗星此天之所以去無道而建德 鄭司農曰彗

星主埽除 荊州占曰彗星者君上失政濁亂三光五星

錯逆變氣所生也 甘德曰彗星春夏出為饑秋冬出為

兵 郝萌曰彗星出短為饑出長為兵向下為土功皆以

其下邦分占之 荊州占曰諸彗星出長三文已上期一年

四丈已上期三年十丈已上期五年黃帝曰彗星所干歷

百日已上期三年一百五十日已上期五年二百日已上期七年

運斗樞曰彗星見後曲象旗則王者征伐四方 荊州占

曰彗星見敵國兵起得本者勝又曰彗星昏見其國受兵

又曰彗星見久其災深大見短其災淺小又曰彗星長音天者

人主亡 河圖帝覽嬉曰彗星出東方河逆波將相有

謀春秋保乾圖曰彗星東出君臣爭明 荊州占曰彗星

出有叛者兵起其國一曰不出一歲天下有大水其邦尤甚

春秋合誠圖曰蒼彗出賊至天子自用兵不出三年赤彗
出如火耀賊起強國縱恣大兵不出三年黃彗出如垂雲
見則女亡危期一年白彗出如鋒刃長四丈見則將叛兵
起期二年黑彗出賊起江河決期二年 春秋曰齊景
公睹彗星使伯常騫禳之晏子曰不可此天教也日月
之氣風雨不時彗星之出天爲民之亂見之又曰景公睹
彗星出而泣晏子問之公曰寡人聞彗星出所向之國君
當之今彗星出而向吾國我是以悲晏子曰君之行義
固應無德於國穿開池則欲其深以廣也爲臺榭則
欲其高且大也賦斂如撓奪誅戮如仇讎自是觀之字
又將出彗星之出庸何巨乎按如晏子之言字之與彗
如似匪同

漢武帝建元六年彗星見或謂淮南王安曰天下兵當
大起安心以爲上未有太子天下有變諸侯並爭乃治戰
攻具積金錢賂遺郡國遊士羣臣賓客江淮間多
輕薄妄以妖言讒諛而謀逆

漢孝明帝永平三年六月丁卯彗星出天船北長二尺所
稍北行至亢南百三十五日去天船為水彗出之為大水是
歲伊雒水溢到津城門壞伊橋郡七縣三十二皆大水
漢孝明帝永平十八年六月己未彗星出張長三尺轉
在郎將南入太微皆屬張張周地為東都太微天子廷
彗星犯之為兵喪其八月壬子孝明帝崩

漢武章帝建初元年八月庚寅彗星出天市長二尺所
稍行入牽牛三度積四十日稍滅彗星出天市為外軍牽

卷之二十八

牛為吳越是時壘夷陳縱等及哀牢王類反攻蕉唐

城永昌太守王尋走奔楛榆安夷長宋延為羌所殺以
武威太守傅育領護羌校尉馬防行車騎將軍征西羌
又阜陵王延與子男魴謀反大逆無道得不誅廢為侯
漢孝桓帝建和三年八月乙丑彗星芒長五尺見天市
中東南指色黃白彗星見天市中為質貴人至和平
元年十二月甲寅梁太后崩梁冀益驕亂

漢孝靈帝光和元年八月彗星出亢北入天市中長數

尺稍長五六丈赤色經歷十餘宿八十餘日乃消於天苑
中彗星除天市天帝將徙帝將易都至初平元年獻
帝遷都長安

漢孝靈帝光和三年冬彗星出狼弧東行至于張乃去
張為周地彗星犯之為兵亂後四年京都大發兵擊黃
巾賊

魏明帝青龍四年十一月己亥彗星見犯官者天紀星占
曰官者在天市為中外有兵天紀為地震彗星加之主兵喪

卷之二十八

至景初元年六月地震九月吳將朱然圍江夏皇后毛氏

崩二年正月討公孫文懿三年正月明帝崩

魏少帝正始元年十月乙酉彗星見西方在尾長二丈拂
牽牛犯太白十一月甲子進犯羽林占曰尾為燕又為吳牛
亦吳越之分太白為上將羽林中軍兵為吳越有喪中軍
兵動二年五月吳遣三將寇邊吳太子登卒六月宣帝討
諸葛恪於皖太尉滿寵薨

魏少帝正始六年八月戊午彗星見七星長二尺色白進

至張積二十三日滅七年十一月癸亥又見軫長一尺積百五十六日滅九年三月又見昴長六尺色青白芒西南指七月又見翼長二尺進至軫積四十二日滅案占曰七星張為周分野翼軫為楚昴為趙魏彗所以除舊布新主兵喪也至嘉平元年宣帝誅曹爽兄弟及其黨與皆夷三族京師嚴兵三年誅楚王彪又襲王浚於淮南淮南東楚也魏諸王幽于鄴

魏宣帝嘉平四年二月丁酉彗星見西方在胃長五六丈色白芒南指貫參積二十日滅五年十一月彗星又見軫長五丈在太微左執法西東南指積百九十日滅按占曰胃兗州之分野參主兵太微天子庭執法為執政彗為兵喪除舊布新之象至正元元年二月李豐豐弟翼后父張緝等謀亂皆誅皇后亦廢九月廢帝為齊王

魏高貴鄉公甘露二年十月彗星見角色白占曰彗星見兩角間色白者軍起不戰邦有大喪景元元年高貴鄉公為成濟所害

魏元帝景元三年十月壬寅彗星見元色白長五寸轉北行積四十五日滅占曰為兵喪一曰彗星見元天子失德四年鍾會鄧艾伐蜀剋之二將反亂皆誅

魏文帝咸熙二年五月彗星見王良長丈餘色白東南指積十二日滅占曰王良天子御駟彗星埽之禪代之表除舊布新之象白色為喪王良在東壁宿又并州之分野八月文帝崩十二月武帝受魏禪

晉武帝泰始四年正月丙戌彗星見軫青白色西北行又轉東行占曰為兵喪軫又楚分野三月皇后王氏崩十月吳寇江夏襄陽

晉惠帝永康元年十二月彗星出牽牛之西指天市占曰牛者七政始彗出之改元易號之象也天市一名天府一名天子旗帝坐在其中明年趙王倫篡位改元尋為大兵所滅晉惠帝永康二年四月彗星見齊分占曰齊有兵喪是時齊王囧起兵討趙王倫滅囧擁兵不朝專權淫奢明年誅死

晉惠帝太安元年四月彗星晝見二年三月彗星見東方指三台占曰兵喪之象三台為三公三年正月東海王越執太尉長沙王乂張方又殺之

晉成帝咸康二年正月辛巳彗星夕見西方在奎占曰為兵喪奎又為邊兵三年正月石季龍僭天王位四年石季龍伐慕容皝不克既退皝追擊之又破麻秋時皝稱蕃邊兵之應也

晉康帝建元元年十一月六日彗星見亢長七尺白色占曰亢為朝廷主兵喪二年康帝崩

晉穆帝永和五年十一月乙卯彗星見于亢芒西向色白長一丈六年正月丁丑彗星又見于亢占曰為兵喪疾疫其五年八月褚裒北征兵敗十一月冉閔殺石遵又盡殺胡十餘萬人於是中土大亂十二月褚裒薨是年大疫

晉穆帝升平二年五月丁亥彗星出天船在胃占曰為兵喪除舊布新出天船外夷侵一曰為大水四年五

月天下大水五年穆帝崩

晉安帝義熙十一年五月甲申彗星二出天中掃帝座在房心北房心宋之分野案占得彗柄者興除舊布新宋興之象

南齊和帝中興元年三月乙巳彗星竟天至二年正月戊戌宣德皇太后臨朝加大司馬蕭衍位相國梁公備九錫禮爵為梁王至四月辛酉禪位皇太后遜居外宮梁受命奉帝為巴陵王

陳世祖文皇帝天喜六年六月辛酉彗星見于上台至次年四月癸酉帝崩于有覺殿帝起自布衣知百姓疾苦國家資用務從儉約妙識真偽下不容姦每雞人伺漏傳籤於殿中者令投籤於階石上鎗然有聲云吾雖得眠亦令驚覺其自強若此

陳廢帝伯宗光大二年六月丁亥彗星見十一月甲寅慈訓太后令降為臨海郡王至太建二年四月乙卯薨時年十九帝性仁弱無人君之器及即尊位刑政皆歸冢

宰故宣太后稱文帝遺志而廢焉

周高祖武帝保定五年六月庚申彗星出三台入文昌
犯上將後入紫微宮西垣入危漸長一丈餘指室壁後百
餘日稍短長二丈五寸在虛危滅至次年陳文帝薨子
伯宗嗣立

北齊後主天統元年六月壬戌彗出文昌東北其大如手後
稍長至丈餘百日乃滅占曰有大喪有亡國易政至四年太
上皇崩

北齊後主天統四年六月彗星見于東井占曰兵喪並
起大亂易政十二月辛未太上皇崩

隨煬帝大業四年九月戊寅彗星出五車掃文昌至
房而滅至六年正月朔有盜數十人皆素冠練衣焚
香持華自稱彌勒佛入自建國門監門者皆稽首既
而奪衛士仗將為亂齊王暕遇而斬之於是都下大
索與相連坐者千餘家

唐高宗總章元年四月丙辰彗星見畢昴間上避正殿

滅膳羣臣言星雖彗而光芒小非國膏不足勞虜上
曰上天謫見豈可不懼羣臣又言星見東北方高麗
將滅之應上曰高麗百姓即朕之百姓朕為天下主豈
可推過小藩乙亥彗滅九月癸巳李勣破高麗至鴨
渌水引軍圍新市城城中窘迫其王高藏遣男
產持帛幡出降勣接之以禮

唐高宗上元二年七月彗起東井指北河漸東北行長
三丈埽中台至文昌凡五十八日方滅占曰彗星出除舊
布新之象時上以風疹多不視朝政事皆決於武后
唐則天嗣聖元年七月彗星見西方長二丈餘經三十
三日乃滅占曰為兵喪九月徐敬業殺長史陳敬之據揚
州起兵自稱上將軍以匡復為詞楚州司馬李崇福率
兵以應敬業上遣李孝逸為大總管率兵三十萬討平之
唐中宗景龍元年十月彗星見于西方月餘乃滅占曰
彗星出所以去無道建有德尋後韋后干預國政時
樂安公主志欲皇后臨朝稱制求立為皇太女由是與后

合謀連鴆六月帝遇毒崩于神龍殿

唐肅宗乾元三年四月丁巳彗出東方色白長四尺在婁胃間疾行向東北角歷昴畢觜參井鬼柳軒轅至太微左執法七寸凡五十餘日方滅占曰彗星出主兵喪至次年二月戊寅李光弼率河陽之軍與史思明之衆戰於北邙官軍敗績河陽懷州並陷賊京師戒嚴

唐代宗大曆五年四月己未彗出五車光芒長三丈至癸未隨天東行近八穀占曰主水潦穀貴是歲自四月霖雨至秋末方息京城大水米斗千文

唐憲宗元和十二年正月戊子彗出畢南長尺餘指西南凡三日南近參旗而沒至四月辛卯李光顏破蔡賊於郾城死者什三萬獲馬千疋器甲三萬

唐文宗開成元年三月甲子朔其夜彗長五丈岐分兩尾其一指氐其一掩房在斗十度丙寅夜彗長六丈尾無岐北指在危七度文宗召司天監朱子容問星變之由子容曰彗主兵旱或破四夷古之占也然天道高遠唯陛下修政以

抗之乃勅尚食今後每日御食料分爲十日詔天下放
擊囚徹樂減膳避正殿先是羣臣拜章上徽號宜
並停

唐文宗開成四年正月彗星見室壁占曰有兵喪水旱
是年六月天下大旱帝憂動於色宰臣奏曰水旱時
數使然乞不過勞聖慮上改容曰朕爲人主無德及天下
致茲災旱謫見于天次年正月辛巳上崩於太和殿

唐昭宗天祐二年春彗星出貫文昌宮占曰大臣戮是歲
朱全忠殺唐丞相三省官殆盡

後梁高祖天祐二年四月甲辰有彗星出於北河貫文
昌長三文餘五月乙丑復自軒轅大角及於天市垣長六
七丈光輝炎猛仰矚者咸所惴恐占者云不利大臣時

唐宰相柳璨性陰狡貪權惡大臣裴樞等在已上謀
欲傾之乃譖帝曰紊亂朝憲良由衣冠浮薄之輩宜
並去之以清天步至是因星文謫見璨乃請罪樞等以
塞其變六月戊子左僕射裴樞右僕射崔遠靜海軍

節度使獨孤損尚書陸扆王溥司空裴執贄太子太保
趙崇兵部侍郎王贊等八人皆貶於遠郡尋賜死於
滑州白馬驛樞等既死天下寃之

後梁高祖乾化二年四月甲戌夕有彗星出於靈臺
長三尺占曰彗星所以除舊布新時博王友文修飾
東京大內畢功帝方不豫乃力疾乘輦遊于其間
因登一砌臺顧謂近臣曰我今生不復登此臺矣近臣
諸侯王悽然洒泣尋有郢王友珪弒逆

後唐末帝清泰三年十月丁巳夜有彗星出虛危長
尺餘占曰彗出去無道建有德至十一月丁卯戎王立石敬
瑭為大晉皇帝約為父子之國改元天福

後漢高祖天福十二年閏月丁丑有彗星出於張至八月
己酉吏部尚書薛懷讓奏收復邢州殺偽命節度
使知州事劉鐸

彗星占

傳曰彗星者惡氣所生為亂兵

星占曰其國
內外用兵也

其所以

孛德孛德者亂之象不明之表又參然孛焉兵之類也故名之曰孛孛之為言猶有所傷害有所妨蔽

春秋文公十四年七月有星孛于北斗董仲舒曰孛者

闇亂不明之貌北斗大國象後齊宋魯莒晉皆弑君

顏師古曰文公十四年齊公子商人弑其君舍十六年宋人弑其君杵臼十八年襄仲殺惡及視莒弑其君庶其宣二年

晉趙穿攻靈公於桃園劉向以為君臣亂於朝政令虧於外則上

濁三光之精五星羸縮變色逆行甚則為孛北斗人君象

孛星亂臣類篡殺之表也星傳曰魁者貴人之牢又曰

孛星見北斗中大臣諸侯有受誅者一曰魁為齊晉夫

孛星較然在北斗中天之視人顯矣

顏師古曰視讀曰示

史之有

占明矣時君終不改寤是後宋魯莒晉鄭陳六國咸弑

其君

顏師古曰宋魯莒晉已解於上宣四年鄭公子歸生弑其君夷十年陳夏徵舒弑其君平國

齊再弑焉

顏師古曰再弑者商人殺舍而問職等又殺商人

中國既亂夷

狄並侵兵革縱橫楚乘威席勝深入諸夏

顏師古曰謂邲戰

之後六侵伐

顏師古曰謂宣十二年春楚子圍鄭夏與晉師戰于邲晉師敗績十三年楚子伐宋

十四楚子圍宋成二年楚師侵衛遂侵魯師于蜀成六年楚公子嬰齊帥師伐鄭

一滅國

顏師古曰

謂宣十二年 觀兵周室 顏師古曰 晉外滅二國 顏師古曰

楚子滅蕭 已解於上 顏師古曰 晉外滅二國 曰謂宣

十五年晉滅赤狄潞氏 顏師古曰 謂成元

十六年滅赤狄甲氏也 年晉敗王師于質

也 戎是 又連三國之兵大敗齊師于鞏 顏師古曰 謂成二

李孫行父衛孫良夫曹公子首及齊 追亡逐北東臨海

侯戰于鞏齊師敗績鞏齊地 威陵京師武折

水 顏師古曰 謂逐之三周華不注又從

大齊皆孛星炎之所及流至二十八年 顏師古曰 炎音

同 星傳又曰孛星入北斗有大戰其流入北斗中得名人

孟康曰 謂 不入失名人宋華元賢名大夫大棘之戰華元獲

於鄭 顏師古曰 宣帝二年宋華元帥師及鄭公子

歸生戰于大棘宋師敗績獲華元大棘宋地 傳

舉其效云左氏傳曰有孛星北斗周史服曰不出七年

宋齊晉之君皆將死亂 顏師古曰 史服

斗有環域四星入其中也斗天之三辰綱紀星也宋齊晉

天子方伯中國綱紀彗所以除舊布新也斗七星故曰

不出七年至十六年宋人弑昭公 顏師古曰 十八年齊

人弑人懿公 顏師古曰 宣公二年晉趙穿弑靈公昭公

七年冬有孛孛于大辰董仲舒以為大辰心也心為明

堂天子之象後王室大亂三王分爭此其效也

顏師古曰三王

已解於上

劉向以為星傳曰心大星天王也其前星太子後星

庶子也尾為君臣乖離字星加心象天子適庶將分爭

也

顏師古曰適讀曰嫡

其在諸侯角亢氏陳鄭也房心宋也後五

年周景王崩王室亂大夫劉子單子立王猛尹氏召伯

毛伯立子鼫子鼫楚出也

顏師古曰姊妹之子曰出

時楚彊宋衛

陳鄭皆南附楚王猛既卒敬王即位子鼫入王城天王

君狄泉莫之敢納五年楚平王居卒子鼫奔楚王室乃

定後楚帥六國伐吳吳敗之于雞父殺獲其君臣

顏師古曰昭二

十三年楚遂越帥師及頓胡沈蔡陳許之師與吳師戰于雞父楚師敗績胡子驍沈子逞滅獲陳大夫夏鬻雞父楚

地又績曰甫

蔡怨楚而滅沈楚怒圍蔡吳人救之遂為柏

舉之戰敗楚師屠郢都妻昭王母鞭平王墓

顏師古曰沈楚

之與國定四年四月蔡公孫姓帥師滅沈以沈子嘉歸秋楚為沈故圍蔡冬吳興師以救之與楚戰于柏舉楚師敗績庚辰吳入郢君舍乎君室大夫舍乎大夫室妻楚王之母捷平王之墓也此皆字彗流災所及

之效也左氏傳曰有星孛于大辰西及漢申縹曰彗所

以除舊布新也

顏師古曰申縹魯大夫

天事恒象今除於火火出

必布焉諸侯其有火災乎梓慎曰往年吾見是其徵也

火出而見今茲火出而章必火入而伏其居火也久矣其與不

然乎火出於夏為三月於商為四月於周為五月夏數得

天若火作其四國當之在宋衛陳鄭乎宋大辰之虛陳

太昊之虛鄭祝融之虛顏師古曰虛讀皆曰墟其下並同皆火房也星

孛及漢漢水祥也衛顛帝之虛其星為大水水火之牡

也張晏曰水以天一為地二牡丙與午南方火也子及壬北方水也又其配合其以丙子若壬午

作乎水火所以合也若火入而伏必以壬午不過見之月明

戰象二十八

年夏五月火始昏見丙子風梓慎曰是謂融風火之

始也張晏曰融風立春木風也火之母也火所始生也淮南子曰東北曰炎風高誘以為民氣所生也炎風一曰

融七日其火作乎張晏曰自丙子至壬午凡七日既其配合之日又火以七為紀戊寅風

甚壬午太甚顏師古曰太甚者又更甚也宋衛陳鄭皆火劉歆

以為大辰房心尾也八月心星在西方孛從其西過心東

及漢也宋大辰虛謂宋先祖掌祀大辰星也陳太昊虛

羲木德火所生也顏師古曰虛讀與伏同鄭祝融虛高辛氏火

正也故皆為火所舍衛顛帝虛星為大水營室也天星

既然又四國失政相似及為王室亂皆同哀公十三年

冬土月有星孛于東方董仲舒劉向以為不言宿名著

不加宿也孟康曰不在二十八宿之中也以辰乘日而出亂氣蔽君明

也明年春秋事終一曰周之十月夏九月日在氏出東方

者軫角亢也軫楚角亢陳鄭也或曰角亢大國象為齊

晉也其後楚滅陳顏師古曰襄十七年楚公孫朝師師滅陳也田氏篡齊

顏師古曰齊平公十三年春秋之傳終矣平公二十五年卒卒後七十年而康公為田和所滅六卿分晉

顏師古曰晉出公八年春秋之傳終矣出公十七年卒卒後八十一年至靜公為韓魏趙所滅而三分其地蓋晉

之衰也六卿擅權其後范氏中行氏智氏滅而韓魏趙兼其土田人衆故摠言六卿分晉也此其效也

劉歆以為孛東方大辰也不言大辰旦而見與日爭光

星入而彗猶見是歲再失閏十一月實八月也日在鶉火周

分野也

漢高帝三年七月有星孛于大角旬餘乃入劉向以為

是時項羽為楚王伯諸侯顏師古曰伯讀曰霸而漢已定三秦與羽

相拒滎陽天下歸心於漢楚將滅故彗除王位也一曰項

羽阮秦卒燒宮室弑義帝亂王位故彗加之也

漢文帝後七年九月有星孛于西方其本直尾箕末指虛危長丈餘及天漢十六不見劉向以為尾宋地今楚彭城也箕為燕又為吳越齊宿在漢中負海之國水澤地也是時景帝新立信用鼂錯將誅正諸侯王其象先見後三年吳楚四齊與趙七國舉兵反

顏師古曰四齊膠東膠西菑川

濟南也皆誅滅

漢武帝建元六年六月有星孛于北方劉向以為明年淮南王安入朝與太尉武安侯田蚡有邪謀而陳皇后驕恣其後陳后廢而淮南王反誅

漢武帝元封元年五月有星孛于東井又孛于三台其後江充作亂京師紛然此明東井三台為秦地效也

漢宣帝地節元年正月有星孛于西方去太白二丈所劉向以為太白為大將彗孛加之掃滅之象也明年大將軍霍光薨後二年家夷滅

漢成帝建始元年正月有星孛于營室青白色長六七丈廣尺餘劉向谷永以為營室為後宮懷妊之象彗星加

之將有害懷妊絕繼嗣者一曰後宮將受害也其後許皇后坐祝詛後宮懷妊者廢趙皇后立妹為昭儀害兩皇子遂無嗣趙后姊妹卒皆伏辜

漢成帝元延元年七月辛未有星孛于東井踐五諸侯

孟康

曰五諸侯星名出河戎北率行軒轅太微後日六度有餘晨出東方十三日夕見西方犯次妃長秋斗填蠱炎再貫紫宮中大

火當後達天河除於妃后之城南逝度犯大角攝提至

天市而按節徐行服虔曰謂行遲炎入市中旬而後西去五十

六日與倉龍俱伏谷永對曰上古以來大亂之極所希有

也察其馳騁驟步芒炎或長或短所歷奸犯顏師古曰奸音干

內為後宮女妾之害外為諸侯叛逆之禍劉向亦曰三代

之亡攝提易方秦項之滅星孛大角是歲趙昭儀害兩

皇子後五年成帝崩昭儀自殺哀帝即位趙氏皆免

官爵徙遼西哀帝亡嗣平帝即位王莽用事追廢成

帝趙皇后哀帝傳皇后皆自殺外家丁傅皆免官爵

徙合浦歸故郡平帝亡嗣莽遂篡國

漢世祖元年冬十一月有星孛于張本志曰孛星氣所生
或謂之彗星張為周分其後世祖都洛陽除穢布新之象
漢獻帝初平四年十月孛星出兩角間東北行入天市中
而滅占曰彗除天市天帝將徙帝將易都是時上在長安
後二年東遷明年七月至雒陽其八月曹公迎上都許
漢獻帝建安五年十月辛亥有星孛于大梁冀州分也
時袁紹在冀州其年十一月紹軍為曹公所破七年夏紹死
後曹公遂取冀州

漢獻帝建安九年十一月有星孛于東井輿鬼入軒轅
太微十一年正月星孛于北斗首在斗中尾貫紫宮及北
辰占曰彗星埽太微宮人主易位其後魏文帝受禪

漢獻帝建安十二年十月辛卯有星孛于鶉尾荆州分
也時荆州牧劉表據荆州時益州從事周羣以荆州
牧將死而失土明年秋表卒以小子琮自代曹公將伐荆
州琮懼舉軍詣公降

漢獻帝建安十七年十二月有星孛于五諸侯周羣

以爲西方專據土地者皆將失土是時益州牧劉璋據益州漢中太守張魯別據漢中韓遂據涼州宋建別據枹罕明年冬曹公遣偏將擊涼州十九年獲宋建韓遂逃于羗中病死其年秋璋失益州二十年秋公攻漢中魯降

魏文帝黃初六年十月乙未有孛于少微歷軒轅占爲兵喪除舊布新之象時帝軍廣陵辛丑親御甲冑觀兵明年五月帝崩

魏明帝太和六年十一月丙寅有星孛于翼近太微上將星占曰爲兵喪甘氏曰孛彗所當之國受殃翼又楚分野孫權封略也明年權有遼東之敗又明年諸葛亮入秦川孫權發兵緣江淮屯要衝權自圍新城以應亮天子東征權

魏明帝青龍四年十月甲申有星孛于大辰長三尺乙酉又孛于東方十一月己亥彗星見犯官者天紀星占曰大辰爲天王天下有喪劉向五紀論曰春秋星孛于東方不言宿

者不加宿也官者在天市為中外有兵天紀為地震孛
彗主兵喪景初元年六月地震九月吳將朱然圍江夏
皇后毛氏崩二年正月討公孫文懿三年正月明帝崩
晉武帝咸寧五年三月星孛于柳四月又孛于女御七
月孛于紫宮占曰外臣凌主柳又三河分野大角太微紫
宮女御並為王者明年吳亡是其應也孛主兵喪征吳之役
三河徐兗之兵悉出交戰於吳楚之地吳丞相都督以
下梟戮十數偏裨行陣之徒馘斬萬計皆其應也

晉武帝太康四年三月戊申星孛于西南是年齊王
攸任城王陵琅邪王佃新都王詠薨

晉惠帝元康五年四月有星孛于奎至軒轅太微經
三台大陵占曰奎為魯又為庫兵軒轅為後宮太微天
子庭三台為三司大陵有積尸死喪之事其後武庫火西
羌反後五年司空張華遇禍賈后廢死魯公賈謚誅
又明年趙王倫篡位於是三王興兵討倫兵士戰死十餘萬人
晉惠帝永興二年八月有星孛于昴畢占曰為兵喪昴

畢又趙魏分野十月丁丑有星孛于北斗占曰玳璣更受天子出走又曰彊國發兵諸侯爭權是後諸王交兵皆有其應明年惠帝崩

晉成帝咸和四年七月有星孛于西北犯斗二十三日滅占曰為兵亂十二月郭默殺江州刺史劉胤荊州刺史陶侃討默斬之時石勒又始僭號

晉哀帝興寧元年八月有星孛于角亢入天市案占曰為兵喪三年正月皇后王氏崩二月帝崩三月慕容恪攻沒洛陽沈勁等戰死

晉孝武帝太元十五年七月壬申有星孛于北河戒經太微三台文昌入北斗色白長十餘丈八月戊戌入紫微乃滅占曰北河戒一名胡門胡門有兵喪婦太微入紫微王者當之三台為三公文昌為將相將相三公有災入北斗諸侯戮一曰埽北斗彊國發兵諸侯爭權大人憂二十一年帝崩隆安元年王恭殷仲堪桓玄等並發兵表以誅王國寶為名朝庭順而殺之并斬其從弟緒司馬道子由是失勢

禍亂成矣

晉安帝隆安四年二月己丑有星孛奎長三丈上至閣道
紫宮西蕃入北斗魁至三台三月遂經于太微帝座端門
占曰彗星埽天子庭閣道易主之象經三台入北斗占同上
條十二月戊寅有星孛于貫索天市天津占曰貴臣獄死
内外有兵喪天津為賊斷王道天下不通按占曰災在吳
越五年二月有孫恩兵亂攻侵郡國於是内外戒嚴營陣
屯守柵斷淮口九月桓玄表至逆旨凌上其後玄遂篡位
晉書卷一百一十八
卷一百一十八
亂京都大饑人相食百姓流亡皆其應也

晉安帝義熙十四年五月庚子有星孛于北斗魁中
七月癸亥彗星出太微西柄起上相星下芒漸長至十餘
丈進埽北斗紫微中台占曰彗出太微社稷亡天下易王
入北斗紫微帝宮空十四年劉裕還彭城受宋公十二月
安帝崩

晉恭帝元年正月戊戌有星孛于太微西蕃占曰革命
之兆其年宋有天下

宋高祖永初三年二月丙戌有星孛于虛危三月上不豫
羣臣請祈禱神祇上不許唯使侍中謝方明以疾告
廟而已五月上疾甚召太子誡之曰檀道濟雖有幹略而
無遠志非如兄韶有難御之氣徐羨之傅亮當無異
圖謝晦串從征伐頗識機變若有異必此人也小却可
以會稽江州處之至癸亥上崩于西殿

宋少帝永初三年五月癸亥即帝位至十一月戊午有星
孛于營室十二月庚戌魏軍剋滑臺

宋少帝景平元年正月乙卯有星孛于東壁二月丁丑
皇太后崩

宋少帝景平元年十月己未有星孛于氐是歲魏明皇
帝崩至二年二月己卯廢南豫州刺史廬陵王義真為
庶人徙新安郡

陳高宗孝宣帝太建七年四月丙戌有星孛于大角至
十年六月丁酉周武帝崩

後周高祖武帝天和三年六月甲戌有星孛于東井北行一

月至輿鬼乃滅七月壬寅柱國隋國公楊忠薨

後周高祖武帝建德三年四月丁巳有星孛于東北紫微宮長七尺至十月丙辰上幸同州始州民王鞅擁衆反大將軍鄭恪討平之

隋高祖文皇帝開皇十四年十一月癸未有星孛于虛危及奎婁齊魯之分野其後魯公虞慶則伏法齊公高熲除名

隋煬帝大業十年六月有星孛于文昌東南長五六寸色黑而銳夜動搖而北行數日至文昌去紫微宮四五寸不入却行而滅占曰為急兵其八月突厥圍帝于鴈門從兵悉馮城御寇矢及帝前

隋煬帝大業十三年六月有星孛于太微五帝座色赤黃長三四尺所數日而滅占曰有亡國有殺君明年三月宇文化及等殺帝

唐中宗景龍二年八月有星孛于紫微宮占曰孛者非常之惡氣出于紫宮人君惡之四年六月壬午帝遇毒

崩于神龍殿

唐僖宗光啓二年五月有星孛于尾箕歷北斗攝提占
曰歲饑兵亂是歲蝗蟲旱米斗三十人多相食七月
蔡賊秦宗權陷許州殺鹿晏弘



景祐乾象新書彗星孛占卷第二十八

炎訖

元豐元年三月 日 書庫官臣徐 欽鄰 書

校定將仕郎守司天監主簿充翰林天文同測驗渾儀臣趙 靖

校定將仕郎守司天靈臺郎充翰林天文同測驗渾儀賜緋臣董 惟正

校定文林郎守司天監主簿同知算造臣周 日新

校定文林郎守司天監主簿同管句測驗渾儀臣于 太古

校定文林郎守司天監主簿充翰林天文同測驗渾儀臣王 應

校定承務郎守司天監丞管句書籍臣王 太明

校定儒林郎守司天監丞充曆算主簿兼同知算造臣楊 得言

校定朝奉郎尚書庫部員外郎守曆算管句算書兼同知算造臣周 琮

校定通直郎守司天中官正權判司天監兼提點曆書騎都尉賜紫金魚袋臣丁 洵

樞密直學士尚書省員外郎兼侍讀知通鑑館兼判駁事兼提舉進奏院判書兼提舉儀衛軍器監事提

舉司天監事詳定郊廟奉祠禮樂護軍新郡開國侯食邑五百賜紫金魚袋臣陳 襄



洪憲紀元二月十九日章年正月初

同日華陽高景敬觀

可智

張太老弟
陳孚恩

新古真精宮姑及得祝三飲耶
荷市之款聚並願信侯而心
新古也此以信

洪憲紀元二月十三日易順鼎敬觀

同日程清敬觀柏青侍

圖書在版編目(CIP)數據

景祐乾象新書〔宋〕楊惟德等撰.—北京:北京圖書館出版社,2003.12

(中華再造善本)

ISBN 7-5013-2296-1

I.景… II.楊… III.迷信術數—中國—宋代

IV.B992

中國版本圖書館CIP數據核字(2003)第080013號

ISBN 7-5013-2296-1



9 787501 322961 >

書名 景祐乾象新書(全八冊)
著者 〔宋〕楊惟德等 撰

出版 北京圖書館出版社(100034 北京市西城區文津街七號)
發行 Tel:(010)66151313 Fax:(010)66174391
E-mail: Btsfxb@publicf.nlc.gov.cn
Website: www.nlcpress.com

印刷 金壇市古籍印刷廠

開本 八
印張 一〇一·七五
版次 二〇〇三年十二月第一版第一次印刷
印數 一—二〇〇〇

書號 ISBN 7-5013-2296-1 / K·661
定價 三二六〇圓

